

- प्रधानमंत्री नरेन्द्र मोदी आकाशवाणी रे मन की बात कार्यक्रम मांय प्रदेश रा रामसर रे श्रीअन्न उत्पादक काश्तकारां री सराहवना करी।
- राष्ट्रपति द्रौपदी मुर्मू कह्यो—मतदान लोकतांत्रिक प्रक्रिया मांय नागरिकां री आस्था रो प्रतीक है।
- पद्म पुरस्कार 2026 री घोषणा—प्रदेश रा भपंग वादक गफरुदीन मेवाती अर अलगोजा वादक तागाराम भील ने पद्मश्री अलंकरण।
- प्रदेश रा केई हिस्सा भीषण शीतलहर री चपेट मांय—माउंट आबू मांय आज दूजे दिन भी पारो माइनस मांय दर्ज।

000

प्रधानमंत्री नरेन्द्र मोदी लोगां सू देश मांय बण्योड़ी हर वस्तु री गुणवत्ता मांय सुधार रो संकल्प लेणे री अरज करी। श्री मोदी देशवासियां सू, खासकर स्टार्टअप उद्यमां मांय लाग्योड़ा युवावां सू, गुणवत्ता माथे ज़ोर देणे री अरज करी। आकाशवाणी सू मन की बात कार्यक्रम मांय श्री मोदी कह्यो की भारत री अर्थव्यवस्था तेजी सू विकसित हो री है अर पूरी दुनिया री निजर भारत माथे है। प्रधानमंत्री कह्यो की आपा जो भी मैनुफैक्चर कर रिया हा उणी क्वालिटी ने चोखो बणाणे रो संकल्प लेवा। एड़ो कर र ही आपा विकसित भारत री यात्रा ने तेजी सू आगे ले जा सका हा।

प्रधानमंत्री आप रे सम्बोधन मांय भारत री पिरवार व्यवस्था, समाज सेवा, स्वच्छता अर पर्यावरण संरक्षण समेत दूजा विषयां रो जिक कर्यो। वणा कह्यो की एक पेड़ मां के नाम अभियान रे तैत देश मांय अबै ताई 100 करोड़ सू बत्ती पेड़ लगाया जा चुक्या है। प्रधानमंत्री श्रीअन्न रे प्रति लोगां रे बधता लगाव री सराहवना करी।

000

आज राष्ट्रीय मतदाता दिवस माथे श्री मोदी कह्यो की मतदाता लोकतंत्र री आत्मा है। वणा युवावां सू अरज करी के वे 18 बरस रा होवता ही वोटर रा रूप मांय खुद ने रजिस्टर जरूर करे। श्री मोदी देशवासियां ने राष्ट्रीय पर्व गणतंत्र दिवस री बधाई देवता थकां कह्यो की ओ दिन आपा ने संविधान निर्मातावां ने नमन करणे रो मौके देवे है।

000

मुख्यमंत्री भजन लाल शर्मा कह्यो के प्रधानमंत्री री कानी सू मन की बात कार्यक्रम मांय रामसर रे जिक सू प्रदेश रा अन्नदातावां ने सम्मान मिल्यो है। प्रधानमंत्री श्री मोदी रो मन की बात कार्यक्रम प्रदेश मांय केई जगावा माथे सामुहिक रूप सू सुणो गयो है।

000

समूचो देश आज राष्ट्रीय मतदाता दिवस मना रियो है। राष्ट्रपति द्रौपदी मुर्मू नुवी दिल्ली मांय राष्ट्रीय मतदाता दिवस जळसे री अध्यक्षता करी। राष्ट्रपति कह्यो है कि मतदान देश री लोकतांत्रिक चुनावी प्रक्रिया मांय नागरिकां रे विश्वास रो प्रतीक है। राष्ट्रपति कह्यो के देश रा सगळा नागरिकां ने आप रे संवैधानिक दायित्वां ने ध्यान मांय राखता थकां आप रे मताधिकार रो रो प्रयोग जरूर करणो चाहिजे।

000

जळसा मांय राष्ट्रपति न्यारी—न्यारी श्रेणियां मांय सर्वश्रेष्ठ चुनावी पद्धति पुरस्कार भी दिया। मीडिया पुरस्कारां री इलेक्ट्रॉनिक रेडियो श्रेणी मांय आकाशवाणी दिल्ली समाचार सेवा प्रभाग ने पुरस्कृत कर्यो गयो। चुनावी भागीदारी बधाणे अर चुनाव रा बारा मांय जागरूकता फैलाणे मांय आकाशवाणी रे योगदान ने महत्ता देवता थकां ओ पुरस्कार दियो गयो है। आकाशवाणी रा महानिदेशक राजीव कुमार जैन राष्ट्रपति सू ओ पुरस्कार लियो। इण मौके

माथे केन्द्रीय कानून मंत्री अर्जुनराम मेघवाल, मुख्य निर्वाचन आयुक्त ज्ञानेश कुमार मौजूद रह्या। अठिने राष्ट्रीय मतदाता दिवस रो राज्य स्तरीय कार्यक्रम जयपुर मांय राख्यो गयो। जळसा मांय राज्यपाल हरिभाऊ बागडे चुनावी गतिविधियां मांय जोरदार योगदान खातिर 79 अहलकारां अर कर्मचारियां ने पुरस्कार दियो। इण मौके माथे श्री बागडे कह्यो के 100 करोड़ सूं बत्ती मतदातावां रे साथै भारत दुनिया रो सब सूं बड़ो लोकतंत्र है। वठिने चुनावी खर्च कम करणे खातिर एकीकृत चुनाव प्रणाली अपणाणे री जरूरत माथे जोर दियो।

000

राष्ट्रीय मतदाता दिवस रे मौके माथे न्यारी-न्यारी जगवा माथे जागरूकता रैलियां भी निकाली। इण में माय भारत- माय वोट रा संदेश रे साथै लोगां ने मताधिकार रा महत्त्व अर लोकतांत्रिक मूल्यां ने मजबूत बणावण खातिर प्रेरित कर्यो गयो।

000

राष्ट्रपति द्रौपदी मुर्मू गणतंत्र दिवस री पैली सिंज्यां परा आज राष्ट्र ने सम्बोधित करेला आकाशवाणी रा सगळे राष्ट्रीय चैनलां माथे इणो प्रसारण सिंज्यां 07 बज्यां सूं व्हेला। दूरदर्शन रा सगळा चैनल हिंदी अर अंग्रेजी मांय इने प्रसारित करेला। आकाशवाणी आप रा क्षेत्रीय चैनलां माथे रात साढ़े 9 बज्यां सूं प्रादेशिक भाषावां माथे राष्ट्रपति रो संबोधन प्रसारित करेला।

000

77 वो गणतंत्र दिवस काले मनायो जावेला। राष्ट्रीय जळसो राजधानी नुवी दिल्ली रे कर्तव्य पथ माथे व्हेला। इण बार री थीम वंदे मातरम् के 150 वर्ष माथे आधारित है। सांस्कृतिक विविधता रे साथै ही ओ आयोजन देशभक्ति अर आत्मनिर्भर भारत रे संकल्प ने समर्पित रहवेला।

यूरोपियन परिषद् अध्यक्ष एन्टोनियो कोस्टा अर यूरोपीय आयोग री अध्यक्ष उर्सुला वॉन डेर लेयेन गणतंत्र दिवस जळसे रा मुख्य अतिथि रे रूप मांय भेळा व्हेला। इण रे साथै ही कर्तव्य पथ माथे न्यारा-न्यारा खेतारां रा 10 हजार खास अतिथि भी मौजूद रहवेला। जळसा मांय भारतीय सेना ऑपरेशन सिन्दूर माथे आधारित झांकी भी प्रस्तुत करेला। गणतंत्र दिवस रो राज्य स्तरीय जळसो जयपुर रे एसएमएस स्टेडियम मांय व्हेला। राज्यपाल हरिभाऊ बागडे झण्डो फहरार परेड री सलामी लेवेला। जळसा मांय राज्य सरकार रा न्यारा-न्यारा मेहकमां री उपलब्धियां ने झांकियां रे माध्यम सूं दिखायो जावेला। इण रे साथै ही राजस्थान पुलिस रा 17 जाबांजो ने उत्कृष्ट सेवावां खातिर राष्ट्रपति पुलिस पदक और पुलिस पदक सूं सम्मानित कर्यो जावेला। गणतंत्र दिवस री पैली आळी सिंज्यां माथे आज राजधानी जयपुर मांय अमर जवान ज्योति माथे राजस्थान पुलिस री कानी सूं बैण्ड वादन अर घुडसवारी शो रो आयोजन कर्यो गयो।

गणतंत्र दिवस माथे प्रदेश मांय सुरक्षा व्यवस्था चाक चौबंद करीजी है। रेलवे टेशनां माथे विशेष सघन जांच अभियान चलायो जा रियो है।

000

पदम पुरस्कार 2026 री घोषणा करीजी है। देश रा सर्वोच्च नागरिक सम्मान मांय भेळो पदम पुरस्कार री तीन श्रेणियां पदम विभूषण, पदम भूषण अर पदमश्री रा रूप मांय दिया जावे है। न्यारा-न्यारा खेतारां मांय असाधारण योगदान खातिर इण बरस भी देश रे कोणे-कोणे सूं गुमनाम नायकां ने पदम पुरस्कार खातिर चुणी ज्यो है। पदमश्री अलंकरण खातिर 54 हस्तियां ने चुण्यो गयो है। इण मांय राजस्थान रा लोक कलाकार अलगोजा वादक तागाराम भील अर भपंग वादक गफरुदीन मेवाती भी भेळा है। डीग जिले रा श्री मेवाती 60 साल सूं बत्ती बकत सूं भी कला साधना मांय लाग्योडो है। वणा कई देशा मांय सांस्कृतिक उच्छवां मांय प्रस्तुतियां दी है अर लोक वाद्य भपंग ने वैश्विक पिछाण दिलाणे री खास भूमिका निभाई है।

000

अलगोजा वादक तगाराम भील लारला 50 बरसा सूं भी बत्ती बगत सूं देश-विदेश मांय अलगोजा वादन कर रिया है। इण पुरस्कार रे खातिर भारत सरकार रो आभार जतायो है।

000.

प्रदेश रा केई हिस्सा आज भीषण शीतलहर री चपेट मांय रिया। माउंट आबू मांय पारो आज दूजे दिन भी माइनस मांय दर्ज कर्यो गयो। खुला इलाकां अर खेतां मांय जमी बर्फ री हल्की परत काश्तकारां री चिंता बधा दी है। नागौर, पाली, बीकानेर रे लूणकरणसर, सीकर रा फतेहपुर अर श्रीगंगानगर मांय सर्द हवावां रे साथै शीतलहर रो प्रकोप रियो। जालौर, चूरु अर सिरोही मांय भी गलनभरी ठण्ड महसूस करी जा री है। मौसम मेहकमो 27 जनवरी सूं उत्तरी-पूर्वी राजस्थान मांय मौसम रे फेरू बदळणे री आस जतायी है। केई हलकां मांय बादळ छाया रहणे, तेज हवावां चालणे, गरज रे साथै बिरखा होणे री अर कठे-कठे ओळा पडने री भी चेतावनी दी है।

000

जयपुर-दिल्ली नेशनल हाई-वे 48 माथे आज दो कारां रो बीचे व्ही टक्कर मांय दो जणा री मौत व्हेगी अर दो जणा री गंभीर रूप सूं घायल व्हे गया। ओ हादसो एक बेकाबू कार रे डिवाइडर पार कर दूजी सड़क रे गेले माथे जा री कार सूं टकराणे सूं व्हयो। घायलां ने एसएमएस सफाखाना मांय भर्ती करायो गयो।

000